



REPÚBLICA DEMOCRÁTICA DE TIMOR-LESTE

GABINETE DO PRIMEIRO-MINISTRO

ALOKUSAUN

SUA EXELÊNSIA PRIMEIRU-MINISTRU,

KAY RALA XANANA GUSMÃO NIAN

IHA OKAZIAUN PRIMEIRA REUNIAUN KONSULTIVA

BA MONITORIZASAUN IMPLEMENTASAUN EFETIVA

ENVOLVIMENTU INTERNASIONÁL

IHA ESTADUS FRÁGEIS

02 Marsu 2009

Ministériu Negósius Estranjeirus, Díli

Suas Exelênsias Senhór Prezidente-da Repúblika
Suas Exelênsias Representantes Korpu Diplomátku
Suas Exelênsias Representantes Organizasoens Internasionais
Suas Exelênsias Representantes Sosiedade Sivil
Senhoras i Senhores,

Uluk nana'in, ha'u hakarak hato'o liafuan agradesimentu ba Banku Mundial tanba apoia realizasaun enkontru ida ne'e no mós ba ita nia Ministra Finansas tanba tenasidade no dinamizmu ne'ebé nia durante ne'e hatudu hodi partisipa iha ajenda ida ne'e, ne'ebé kona-ba efetividade iha Ajuda ba Desenvolvimentu Nasional.

Istória Timor-Leste karateriza ho dezafius lubun ida.

Husi dezafiu atu hetan independênsia ba dezafiu harí joven demokrasia ida, tuir prinsípius Estadu-de Direitu hanesan mós Komunidades Nasoens sira seluk, hodi foti aas ita nia instituiisoens demokráticas hahú husi zero.

Dezafiu konstante ida durante prosesu ida ne'e, mak la iha infra-estruturas bázikas no rekursus umanus ne'ebé preparadus atu akompanha misaun ida ne'e, no mós buat seluktán ne'ebé hanesan konsekuênsia husi período funu ida ke naruk no dolorozu tebes ba ita nia Povu.

Buat hirak ne'e hotu halo parte ita nia karaterizasaun kulturál no forma oinsá timor-oan ida-ida hatudu nia hahalok no lala'ok, i halo mós parte ita nia karaterizasaun ekonómika, ne'ebé ho kresimentu ekonómiku ida ke neineik tebes, tau tan ho rendimentus ne'ebé uitoan liu, hatuur Timor-Leste hanesan páiz ida mós ke kiak liuhotu iha Sudoeste Aziátiku

Fatores hirak ne'e hotu aprezensta riskus boot ba estabilidade nasionál hanesan haré ona katak tinan rua-rua, mosu krize – ka dezafius – ne'ebé ita hasoru to'o oras ne'e.

Tanba ne'e mak ita nia juventude, mak sai uluk liu hanesan ita nia frajilidade ka frakeza!

Dezafiu loloos nian, só agora foin komesa. Independênsia fó kbiit mai ita nia Povu atu iha esperansa katak bele hetan moris ida ne'ebé di'ak liu.

Tuir Vizaun 2020 – ita nia Vizaun Nasionál – ema timór-oan liu kuarenta mil, maka fó-sai sira nia hanoin kona-ba sá ida mak sira hakarak alkansa iha tinan 2020 ne'ebé, karik halo rezumu, signifika katak hakarak halakon moris-kiak, hamlaha, moras no analfabetizmu. Signifika mós katak sira hakarak harí Nasaun dezenvolvida ida ne'ebé aplika lei, jere ho efisiênsia no transperênsia ita nia ekonomia no finansas, no mós, ita nia instituisoens públikas i privadas sira, ita nia sosiedade sivil hamutuk ho lideransa tomak sai duni nu'udár responsáveis ba Povu.

Expetativas hirak ne'e mak hanesan fiu kondutór ba ita nia Governu nia asaun.

Tinan ne'e Timór-Leste selebra 10º aniversáriu kona-ba ita nia desizaun atu harí Estadu-de Direitu Demokrátiku no Soberanu ida, ne'ebé hatudu ona liuhusi Konsulta Populár. Tinan sanulu liubá ita la iha kbiit (**ka, ita la iha liberdade**) atu deside kona-ba buat ne'ebé ita hakarak ba ita nia Povu rasik.

Buat ne'ebé Governu ida ne'e hakarak ba Timór-Leste, mak iha 10º anu ne'e, ita bele taka ona kapítulu ida ne'ebé Timór-Leste mosu hanesan Paíz instável

ida ka Paíz pós-konflitu, ho liafuan seluk, katak Paíz ida ke la iha kbiit atu hatán ba nia populasaun nia expetativas.

Ne'ebé to'o ona tempu atu dehan: Adeus ba Konflitu no Beinvindu ba Dezenvolvimentu!

Atu ida ne'e bele akontese, ita hotu tenke iha konsiênsia kona-ba responsabilidade política lideransa política nian, no mós kualidade partisipasaun povu atu foti desizoens, ne'ebé, hamutuk ho ajudas jenerozas ka fó ho laran luak husi Komunidade Internasionál, bele mós permite hetan ekilíbriu dinâmiku ida entre espetativas populasaun no kapasidade Estadu nian atu kolmata ka satisfáz expetativas hirak ne'e hotu.

Senhoras i Senhores,

Ita hatene katak Ajuda Internasionál mesak de'it, sei la to'o, maski ho mekanizmus ne'ebé koerentes no koordenadus liuhotu.

Reformas ne'ebé Governu Timór-Leste hanoin halo no implementa daudaun ona mak hanesan duni xave ba susesu, hodi nune'e, bele hetan dezenvolvimentu ida ke sustentável no real no mós projetus asistênsia téknika iha ita nia Paíz bele sai efetivus liu.

Nune'e, ho hanoin katak problemas integradus kona-ba pobreza, dezempregu, hamlaha no injustisa sosiál, bele provoka insatisfasaun jerál ba populasaun, i bele tau iha perigu seguransa no estabilidade nasionál, no mós tanba, hanesan kauza ka konsekuênsia, inseguransa no instabilidade bele la permite ita kombate pobreza, maka buat ne'ebé tenke halo uluk liu, mak dezenvolvimentu reformas

estruturais estratéjikas hodi bele harí pilares ka ai-riin boot hodi tonka dezenvolvimentu no hametin liután Estadu.

Akontesimentu iha 11 Fevereiru tinan uluk liubá, maski hanesan xoke todan boot ida ba ita nia populasaun, nia efeitu mak hanesan mós advertênsia ka avizu finál ida kona-ba nesesidade atu halo mudansa hodi rekonthese mós katak prioritáriu tebes atu haré no tetu di'ak fali ita nia polítikas nacionais.

Tanba ne'e maka ita reorganiza fali malu i, ho forma ne'ebé koordenada liu, buka modelu ne'ebé sertu liu ba Timór-Leste, halibur konsensu timór-oan tomak nian no respeita pasus ho tempu ne'ebé presiza, haré-tuir ba ita nia realidade rasik.

Felizmente nia rezultadus mak ita haré daudaun ona!

Wainhira, to'o loro-kraik, ita boot sira sai husi edifísiu ida ne'e, buat ne'ebé ita boot sira bele ba haré iha tasi-ibun ne'ebá, iha “Rua dos Coqueiros”, uluk hanesan de'it mirajen ka la'ós realidade tebes ida, maka: movimentu komersiál, ema la'o pasiar bá-mai to'o oras sai servisu, i labarik sirak halimar kontente iha tasi-ibun.

Ida ne'e mak rezultadu rezolusaun problemas kona-ba seguransa nacionál no introdusaun reforma ne'ebé kle'an tebes iha setór defeza no seguransa, liga ho medidas fundamentais kona-ba justisa sosiál i reformas administrativas, lejislativas no financeiras.

Ne'e mós hanesan rezultadu aumentu investimentu iha sektór públiku, ne'ebé sei finansia nafatin konstrusoens, melhorias ba servisus públikus no programas transferências públikas, polítikas i, ho buat hirak ne'e mak aumenta podér-de

kompra ka kbiit populasaun nian atu sosa sasán, no indiretamente benefisia fali sektór privadu.

Senhór Presidente-da Repúblika

Senhoras e Senhores,

Sei iha buat barak mak presiza halo tan, kona-ba hadi'a prestasaun servisus públikus, maibé, pelu-menus, ami komesa la'o metin daudaun ona tuir dalan ida ne'e.

Governu deside ona katak tinan 2009, sei sai nu'udár **tinan atu hola desizoens krusiais ba dezenvolvimentu infra-estruturas.**

Polítika ida ne'e hola la'ós de'it tanba razoens evidentes katak iha Paíz ne'e la iha duni infra-estruturas, ne'ebé bele oferese kondisoens moris di'ak liu nian ba timór-oan tomak, maibé, mós, tanba komprova tiha ona iha fatin hotu-hotu katak infra-estruturas mak sai baze ba dezenvolvimentu sektores seluk nian, no motór forte ida ba kriasaun empregu.

Dalan ne'ebé iha ita nia oin, eziye koordenasaun boot liu i realidade katak ita ohin mai hamutuk iha ne'e, hatudu momoos katak ita hakarak duni halo buat ne'ebé di'ak liu, ho korajen i determinasaun, ne'ebé presiza duni halo monitorizasaun ba ita nia asoens, tanba ema barak nia vida depende ba ida ne'e.

Instrumentu ida hotu ne'ebé ita dezenvolve dadaun atu permite monitorizasaun ne'ebé efikáz liu mak elaborasaun Planu Estratégiku kona-ba Dezenvolvimentu Nasional, hodi tetu didiák prioridades prinsipais ne'ebé bele halo diferença efetiva ba Paíz, katak, bele ezekutável.

Ita hatene ho experiênsia – rasik i internasionál – katak planu ida só bele sai útil se la’ós improvizadu i bele implementa duni. Timór-Leste asiste ona planus no estudus barak ne’ebé la lori valór akresentadu ba prosesu atu sés husi situasaun konflitu.

Tanba ne’e mak ita hotu empenhadus atu aprende ho lisoens tempu uluk nian i, tanba ita labele ona halo buat rumá ba maluk sira ne’ebé mate no lakon tanba epizódius dramátikus iha ita nia istória, ita sei bele halo buat barak ba sira ne’ebé sei iha esperansa atu hetan moris ne’ebé di’ak liu, tanba destinu ida ne’e, depende barak liu ba governu nia asaun.

Relatóriu ikus liu Banku Mundial nian dehan katak ema timór-oan to’o 500 mil mak moris iha linha pobreza nia okos, i husi totál ida ne’e, metade mak labarik-oan, ne’ebé térus tanba hamlaha no hán-aat.

Númerus hirak ne’e halo ita laran taridu no susar tebes, ne’ebé ita tenke hatene katak buat ne’ebé sei dsikute iha ne’e, durante konferênsia loron rua ne’e laran, maka kona-ba identifikasiasaun indikadores ne’ebé monitoriza ita nia asoens, tanba ne’e mak hanesan determinantes atu halo diferença ba populasaun timór-oan 500 mil ne’e nia moris.

H’au apela portantu ba konsiencializaun kona-ba faktu ida ne’e: katak rezultadus husi trabalhus partisipantes hotu-hotu ne’ebé mai hamutuk iha ne’e, signifika esperansa boot ba serka-de metade populasaun timór tomak nian!

Senhoras i senhores,

Vontades ne’ebé tau hamutuk, implementasaun no monitorizasaun ba planus dezenvolvimentu no manutensaun ba páz i seguransa liuhusi esforsus

konjugadus i koordenadus husi elementus fundamentais 3 – Defeza, Diplomasia no Dezenvolvimentu – bele determina susesu Tímór-Leste nian.

Hatene kona-ba envolvimentu ne’ebé parseirus internasionalis dedika ba ita nia joven paíz, ha’u bele sublinha katak ami nia susesus hanesan mós ita boot sira nia susesus.

Liuhusi programas no estratéjas Governu nian, komplementa ho programas doadores bilaterais i multilaterais, inklui programas Nasoens Unidas, ne’ebé reflete ajuda jeneroza komunidade internasional nian, i liuhusi mekanizmus responsabilizasaun, koordenasaun i monitorizasaun ne’ebé di’ak liu, mai ita halo 10º aniversáriu ba ita nia liberdade ne’e, sai hanesan marku mudansa hodi simu faze foun ida, mak faze dezenvolvimentu sustentável.

Mai ita servisu hamutuk atu nune’e vestíjius ka sinais frajilidade ne’ebé ita seidauk bele halakon iha futuru próximu, labele signifika fali katak ita sei sai nafatin Estadu frájil ba tempu ne’ebé naruk!

Obrigadu barak!

Kay Rala Xanana Gusmão

2 Marsu 2009